

PCN A SERA AÑA 2018 KU GRADO DI KOBERTURA DI 111,5%

Kralendijk- E fondo di penshun Karibe Hulands (PCN) a sera aña 2018 ku un resultado positivo. E grado di kobertura di e fondo, ku ta indiká e obligashonnan di e fondo kontra d e bienenan di e fondo, a yega na 111,5%.

PCN na aña 2018 a sigui rekuperá di momentunan difísil na aña 2017, kaminda e grado di kubertura e tempu ei a baha asina tantu, ku mester a kòrta den benefisio di pensionado i otro partisipante den e fondo. E kòrtamentu den e benefisionan, mas entrada na prima i un aporte finansiero adishonanal di parti di e estado hulandes tur a yuda na rekuperashon di e fondo. E invershonan di PCN na 2018 sinembargo tabata tin un aña ménos faborabel i a konosé un perdida di 5.26%. Di otro banda PCN na 2018 a probechá bastantemente di e echo ku e tasa di interes riba dolar merikano a subi konsiderablemente, loke ta benifisiá e fondo.

PCN entretanto a risibí aprobashon pa su relato financiero pa aña 2018 ámbos di parti di e oficina di akountent Ernst & Young, komo e ofisina di aktuario eksterno Phenox.

PCN durante 2018 a konosé kresementu riba vários terreno, aparte di esun finansiero. E fondo a kuminsá ku preparashonnan pa hasi su propio atministrashon. Te ku fin di aña 2018 e atministrashon di PCN a tuma lugá kompletamente na hulanda. Entrante 2019, PCN ta responsabel pa su propio atministrashon.

E tim di trahadó di PCN entretanto a krese te na un total 10 empleado. E último parti di 2018 a para den lus di reklutashon di empleado nobo i tambe vários kurso pa prepará e fondo pa por hasi su propio atministrashon den kas. E periodo di kapasitashon a sigui den aña 2019.

A base di e resultadonan positivo na 2018, PCN a logra di indeksá penshun i benefisionan pa esnan aktivo ku 2% entra 1 di yanüari 2019.

Na fin di 2018 PCN tabata tin na tur 5.528 persona liá na a fondo, konsistiendo di partisipante aktivo, hende ku a yega di partisipá na e fondo den pasado, i e penshonadonan. E kapital total di e fondo a sera aña 2018 ku un total di 433 miljoen dolar, 19 mion mas ku na fin di aña 2017.



Potret: PCN aktualmente tin un total di 10 empleado. No presente riba e potret ta Ingra Benett di PCN su ofisina na St. Eustatius.